

d'ice'uy, que du pape, et autant de celui-cy que d'Artus le Breton. Mais de la fumee de ce purgatoire tu voulois donner corps à ces furieuses nuës, que tu vas faire esclater sur la teste du pontife de Rome, t'y disposant avec ces paroles :

« Ainsi qu'ils commencerent à lascher leur premier petard, « ou petit tonnerre iesuitique, le temps parauant serein se « brouille tout à coup. »

Voyla doncques vne grande merueille, que le ciel favorise tant, et si à propos les iesuites, les secondant si heureusement en leurs desseins. Tu deuois conjecturer de là, que l'Action estoit agreable aux yeux de Dieu, et ie ne doute point que tu ne l'eusses fait, si tu eusses esté autant affectionné à leur endroit, que tu te monstres liberal à mentir pour les blasonner : tu appelles commencement plus de trois ou quatre heures après auoir commencé : car si tu n'as esté informé à faux, ou si de Lyon allant à Geneue, tu n'as perdu la memoire, tu te souviendras que ces esclairs et petarrades artificielles donnerent commencement à l'action du second iour, pour représenter la generale deflagration du monde, et que depuis l'on ioüa paisiblement au moins quatre grosses heures. Voy doncques, ô espargneur de verité, combien tu es riche en mensonges.

« Le temps, adioustes-tu, se brouille tout à coup, vne nuee creue, vne rauine d'eau s'expand, etc »

Trois iours deuant l'action le temps gros de pluye auoit menacé de fondre ses nues, et les excessiues chaleurs presageoyent que les tonnerres n'arresteroient guiere de se faire ouyr, comme desia il estoit arriué le dimanche precedent à heures de vespres : voire ce mesme second iour de l'action les acteurs estant sur le theatre, l'air brouillé demeura menaçant de pluye plus d'une grosse heure et demie : dequoy s'apperceuans quelques vns bien aduisez firent doubler des toiles sur leus testes pour estre preseruez contre l'eau, quand elle tomberoit : mesme l'on ioüa vn bon quart d'heure la pluye tombant doucement, sans que pour cela ny les spectateurs, ny